


# RAHSIA AL-QURAN - DARI SEGI ILMU DAN FALSAFAH

“Nur Allah Yang Indah Cemerlang”

Dalam ayat yang suci  
mulia ini, Tuhan Azza wa Jalla  
telah memberi tamsil ibarat  
tentang “Nur-Nya” (Cahaya-Nya)  
yang menyinari alam, yang  
menggambarkan kebesaran  
dan kekuasaan-Nya.



Ayat yang ketiga puluh lima, Surah al-Nur  
Khat al-Ustādh “Murtadā”  
Ahli “Seni Tulis” Mesir yang kebilangan

(Oleh ‘Abdullāh Basmeh)

Tamsil ibarat yang indah ini adalah terkandung di dalam  
ayat yang ketiga puluh lima surah al-Nūr, firman-Nya:

“Allāhu nur al-samāwāti wa al-arḍ, mathalu nūrihī kamishkātin  
fīhā mišbāh, al-mišbāḥu fī zujājāh, al-zujājat ka’annahu  
kawkabun durriyyun yūqadumin shajaratīn mubārakatin zaytūnatin lā sharqiyayat  
wala gharbiyyat yakāduzaytuha yuqṭū walawlam tamsashunārun,  
nūrun ‘alā nūrin yahdī Allāh linūrih man yashā’u, wayadrīb  
Allāh al-amthālalinnas, wa Allāh bikullishay’in ‘alīm.”

Ertinya: “Allah yang menyinari tujuh petala langit dan  
bumi, misal cahayanya (kepada orang yang beriman) ialah

seperti sebuah lubang di dinding rumah, di dalamnya pelita, pelita  
itu di dalam gelas. Gelas itu kelihatan laksana bintang  
yang gemerlap di langit. Pelita itu dinyalakan dengan minyak  
dari pokok yang berkat iaitu minyak zaitun yang tiada tumbuh  
di Timur dan tiada tumbuh di Barat, minyak itu hampir  
bercahaya dengan sendirinya (kerana jernihnya), meskipun  
tiada disentuh api. Cahaya berdamping sesama cahaya. Allah  
menunjukkan orang yang dikehendakinya kepada cahayanya itu. Allah  
menunjukkan beberapa misal bagi manusia dan ia mengetahui  
tiap-tiap sesuatu.”

Ayat yang mulia ini telah dihuraikan oleh al-‘Ulamah al-Syeikh Ṭanṭāwī Jūhārī dengan lebih lanjut, katanya:

Allah Subḥanahu wa Ta‘ālā telah menerangkan di dalam Surah al-Nūr ini hukum-hukum berkenaan orang yang berzina, hukum orang yang menuduh isterinya berzina, hukum bersumpah dan bagaimana orang suami isteri akan bercerai kerananya. Kemudian diterangkan “Kisah al-Afak” (kisah dusta pesona yang telah dituduhkan kepada Saidatina ‘Aishah rādī Allāh ‘anhu). Sesudah itu Tuhan memberi perintah supaya orang-orang Islam lelaki perempuan memelihara pandangan mereka, dan jangan perempuan-perempuan Islam mendedahkan perhiasan mereka kepada orang-orang yang bukan muhrimnya. Kemudian diterangkannya hukum nikah kerana membanyakkan keturunan dan memelihara kehormatan, lalu disudahi dengan menerangkan bahawa semuanya itu ialah keterangan-keterangan yang jelas nyata yang menjadi pengajaran kepada orang-orang yang takwa.

Oleh kerana hukum-hukum tersebut bertujuan memperbaiki akhlak dan memelihara susunan masyarakat, dan oleh kerana semuanya itu hanya menjadi pendahuluan kepada tujuan yang lebih tinggi iaitulah ilmu pengetahuan, maka Tuhan Azza wa Jalla telah menunda ayat-ayat suci yang menerangkan hukum-hukum tersebut dengan firman-Nya:

“Allāhu nur al-samāwāti wa al-ard....”

“Allah yang menyinari tujuh petala langit dan bumi....”

Seolah-olah Tuhan Azza wa Jalla membayangkan kepada manusia supaya jangan mereka dilalaikan oleh hukum-hukum syarak, seperti hukum-hukum halal haram, hukum zina, hukum nikah dan sebagainya daripada mengingati kebesaran Tuhan Azza wa Jalla dan mendirikan sembahyang serta mengeluarkan zakat. Sebagaimana di dalam ayat ini telah diterangkan pula:

“Yā ayyuḥā al-ladhīna āmanū al-atlahukum amwālukum awlā dukum a‘n dhikrillāh”.

“Wahai orang-orang yang beriman, janganlah harta-harta dan anak-anak kamu melalaikan kamu daripada mengingati kebesaran Allah.”

Di dalam ayat ini, Tuhan membayangkan bahawa janganlah orang-orang

yang beriman dilalaikan oleh harta benda dan anak pinak daripada membakarkan dan mengkaji kebesaran Allah di dalam alam yang terbentang dengan indahnya- matahari, bulan, tumbuh-tumbuhan, bunga-bunga dan sungai-sungai yang mengalir.

Seolah-olah Tuhan dengan bayangan tersebut menerangkan bahawa manusia tidaklah dijadikan supaya duduk berkekalan di bumi tetapi mereka dijadikan kerana mendiaminya dengan aman damai dalam suatu masa yang tertentu kemudian akan dipindahkan ke negeri (akhirat) yang lebih daripada alam kita ini. Negeri (akhirat) yang lebih indah itu tidak akan didapati melainkan setelah orang-orang yang beriman memandang kebesaran Tuhan Azza wa Jalla di dunia dan mengkaji serta memaham dengan sebenar-benarnya akan hikmat-hikmatnya serta menunaikan perintah-perintahnya.

Ayat suci: “Allāhu nur al-samāwāti wa al-ard....” yang telah diterangkan maknanya adalah suatu misalan yang menjadi pertunjuk bagi alam yang terang benderang. Misalan ini dibayangkan olehnya menyerupai apa yang kita saksikan pada tiap-tiap hari di dalam masjid-masjid kita.

Wahai sekalian hambaku- demikian Tuhan Azza wa Jalla menarik perhatian manusia di dalam ayat yang menjadi misal bandingan ini- mahukan kamu mengetahui hikmahku di dalam makhluk-makhluk yang aku jadikan ini? Lihatlah *candle-candle* (lampa-lampu gantung) yang bergantungan di masjid-masjid kamu.

Pandanglah *candle-candle* itu, tidakkah kamu melihat sumbu kecil yang menyala, yang terletak di dalam gelas yang berisi minyak, dan gelas itu pula terletak di dalam gelok kaca yang menerangi masjid tempat kamu beribadat itu? Susunan (sumbu, gelas minyak dan gelok kaca) yang merupakan sebuah candle yang menerangi masjid, samalah seperti keadaan “nur”ku yang cemerlang yang terkandung di dalam alam indah yang aku jadikan itu. Demikianlah bayangan Tuhan.

Gambaran ini menyebabkan alim ulama’ dan ahli-ahli pengetahuan Islam masing-masing memahamkannya menurut fahaman sendiri-sendiri, sehingga timbul enam fahaman, bahkan ada pula yang ketujuhnya sebagaimana yang akan dihuraikan- Inshā Allāh- dalam bilangan yang akan datang.